

Cheeti da Yuuda Gimba guri giyaada

Cheetiti da qunqumaadi Yuuda naggaa handikimi. Ina yaati le'e gu hhee gu Yeesu. Ina yaati handikimi cheetiti sa hida wakinay go'o /imbee Kristu, hhaa daa impakaruudisi ha maarimamaa da afa'afuuma. Maarimamati yaatii fokaakita caacaahhamisi gu gimba gu hhoonay gu didiri gu Iliitleemu. Slime, yaati hiifaafahhaahhanta hida go'o /imbee Kristu, ma ibiidiri tlakwarooge. Yuuda hiti laqaaqana ila'aa'aatimisu angaamaka Ila/imbidu gu Segugo sa tlaatlaqasa hida go'o /imbee Kristu. Hari amotee, ma ooyiri nara'a caacaahhamisu gu lou gu Iliitleemu haa Gimba gu Hhou gu Yeesu Kristu, idoo giyaa ilii akhasiri gooy daqa ya/abimiisee da Yeesugo.

Cehheemisu

¹ Cheetiti yaa daqa doyi dahhada ana Yuuda, tongimoo gu Yeesu Kristu, haa hhaa gu coko'u gu Yakoobo. Ana sangu handikiikima cheetiti, sa unkuray daa eteedi haa da slaiye ha Iliitleemu Taataa, haa do'o ga/aye ha Yeesu Kristu. ² Ana sangu firiirima ambee, /awaariru, qasaw haa sla'amuu go'o daqa Iliitleemu dahhee, hiirgidiye daqa doogunay hari khisla.

Hangu ga/aydee haa maarimamaa da afa'afuuma

³ Hhiee koi ga slae, ana haa kooma kwayru gu handikiru sa unkuray, gimba gu ilabu'uruki gaa oowani gonkotaa. Teesaaqay see, hanti arimi nara'a ambee, ba/ay sanguti handikima, mangu tlaatlaqasi unkuray, ma ilakontiri ga/aw /imba daa taataahi ha Iliitleemu waa leẽ kilesi, sa hida kosi gubasli tlakwaroo. ⁴ Sa gimba, wanay hida wakinay gooba muriida Iliitleemu, gungii guumee hari hhaaboo tla/aã googunay, hida saa hhe'esi handikiru hukumuu gu /agitiru gooina tlaatleesoogo. Hida hhangi hiifokaakidiyay ya/aboo da hhoinay gu didiru gu Iliitleemu goori, ma ibiidiri ibidinaa da slipalauuma. Kara tlatlankiikinay Yeesu Kristu, ina gu leẽ Giyaadimiisay goori haa Looimoo goori.

Maarimamaa da afa'afuuma hukuruu gooina

⁵ Inkoo, unkuray gaamati hhe'esidiri caah-haraa gimbaki goõ, ana hangu sla'a maay slay-diri tuba, Taataa Iliitleemu* giyaa ilii hhe'esi ilabu'uru hida gu Israeeli hhapee da Misirigo,✧ qariqaaqari yaa hhamisi hhakira goõ gwaaba /imba.✧ ⁶ Slime, slawaw malayikatira, daaba bu'udisa hari kofiyaa sigaa hadisi ha Iliitleemu, inay gi mayri daqa daa tooina loi. Iliitleemu giĩ qaasi inay daqa da hhanteege, tay digiĩ khiidimi hari nyololoo da koraraa gooba hiifaakoo, ma baqamidiri balotira da didiri da hukumuu.

* **1:5** 1:5 Taataa Iliitleemu: Ti'ii handikaa waka da segi yoóti kaada tuba ti, Looimoo gu Goõ Yeesu. ✧ **1:5** 1:5 Yu'udii kitaabuu gu Hiica/araa 5:1-12:51. ✧ **1:5** 1:5 Yu'udii kitaabuu gu Faadoo 14:26-35.

7 Kara, slawaw yaamu gu Sodoomaa haa Goomoora, haa yaamu gwaa kengeemoo koinay waaree. Hida gu yaamu hhakee, inay see, yaa yondiidiri malayikatira pahha, yaa yondiidiri slipalauuma, haa gimba gu pasla gu ilatlehha gu slaqoo koina. Inay digigi /agitimi hari aslaa da koraraa goóba hiifaakoo, ma ila'aa'aatisa tleehhidiri sa hida goõ.✧

8 Namati teesaaqay, slime hida hhakee goó tletiimee tletaa, yoóti tlufu'umisiyay slaqoo koina hari tletaa hhakee. Kara, inay yoóti sisi'iyay Tawaaloo da Iliitleemu, haa yoóti wahaahanay idadu gu hhoinay gu slafee gu rawge waaree. 9 Mikayeeli see, malayika gu didiru gu Iliitleemu, hingaa ilii kabaaba'iyee haa Biriisimoo sa tuu'una da Musaa, gwaa koisiiba sitaakiru Biriisimoo hari belendeqesa. Ina yaati kaay kilesi tuba, "Taataa Iliitleemu, ina loi ilii'oo'iyee ugu!" 10 Teesaaqay see, hida hhanki goóba gwaa'amee Iliitleemu, inay yoóti wahaahanay gimba gi hhidinee. Kara, gimba gi khuiyege ilahudaa see guba, inay yoóti yondiidiyay makay pahha gubasli waaway. Gu lou, hiĩ na gimba guroó khawa hhamisaraa daqa dooinay.

11 Iliitleemu /agitina hida hhakee, sa gimba inay sirakomaamidiyay amoo da Kayiini heedi gu tlaku. Kara, sa slahhaahhaau gu slawaraa hindaqaruumaa, hingii huuri dakoo da Bala'aamuge. Gu lou, Iliitleemu hhamisi inay, sa gimba hiĩ si'iri Koora gooay, idoo giyaa iliisi'i

✧ 1:7 1:7 Yu'udii kitaabuu gu Tlaatleesoo 19:11-28.

dugugi hhamisi. ✧ ¹² Hida hhanki ti hhafideerii pahha tla/ã googunay, goó ilii /agintee loseenoo kokunay gu sla'amuu haa inay. Inay hingoóti /agimisiyay inay kilakoina ilamuree see gubasli, ti de'emii seta'a pahha dingoó /agimisa inay kilakoina. Inay ti tlongata'a pahha dabasli ma'ay, doóyii fahhasiye ha pupuiya. Inay ti khai hhaka'a pahha gwaa gaagahhadee, gubasli /aamuuda /aamu gimati qatlay gu bu'uu'uru see. Kara ti khai daa tu'umi pahha haa gi kaka'iri sumuku. ¹³ Hida hhakee goóba gwaa/amee Iliitleemu, ti ilawa'íya da dihhi pahha da tlawa da didiri, yondu gooina gu ilamuree, dugoóti arina slubariya da ilawa'íya pahha. Kara, inay ti tica'eerii hhaka'a pahha goó hhangwaayuusee. Iliitleemu sigaa hhe'esi, sigaa qaasi daqa hhantee da didirige da koraraa goóba hiifaakoo.

¹⁴ Enooki, okookoo gu laqwaloo da fanqu daqa Adaamugo, yaa tletimi daqa hida hhakeesii tuba, "Yu'udaa, Looimoo gu Goõ yaa khoci sliimaa haa malayika dosi daa tlinti'isi, doóbasli hiidahhasa faadoo. ¹⁵ Ina yaa khay, ma hukumi hida goõ, haa gi /agitina hida hhaka'a goõ, goóba muriida Iliitleemu. Inay digiti /agitina, sa yondu gooina goõ gu tlaku giyoó yondiidiyee, muriida see guba Iliitleemu, haa sa gimba goõ gu tlaku, hida gu koomee tlakwaroo giyoó gimbuumisiyee daqa dosii." ¹⁶ Balalu sliimaa hida hhanki yoóti quru'iyay, yoóti dabimidiyay dakoo daqa hida wakinayge, haa yoóti sirakomamidiyay slah-

✧ **1:11** 1:11 Yu'udii kitaabuu gu Tlaatleesoo 4:3-8; Faadoo 22:1-35; 16:1-35; 31:16; 2 Peetiro 2:15.

haahhaau gooina gu tlaku. Kara, inay hingoótii duubiyay inay kilakoina hari gimba gu denu, haa yoóti dumbeesiyay hida wakinay, ma slayri faydaa daqa dooinaa.

Ili'oo'a haa ilakaawa

¹⁷ Inkoo, unkuray hhiee koi ga slae, slawaw gimba daa gimbuusi waka'alee ha ya/abimiisee da Looimoo goori gu Goõ Yeesu Kristu. ¹⁸ Inay sangwaa kaayri unkuray tuba, “Balalu gu hi-ifaakooge, maay caca'iyay hida gumaa belend-egemisee Iliitleemu haa hida kosi. Hhakee na hida hhaka'a goó sirakomamidee slahhaahhaau gooina gu tlaku.” ¹⁹ Hida hhakee noó /sinay unkuray mangi deehhihintiri raqoo paslaa-pasloo. Inay digoóti tawaalina ha slahhaahhaau gu slaqoo koina, kara konaaiiba Muuna gu Iliitleemu wa'ay koinay.

²⁰ Teesaaqay see, hhiee koi ga slae, unkuray hangii /atlimisidee nara'a /imba doogunay daa tlinti'isige khisla. Kara, firiirima hari /uuru gu Muuna gu Iliitleemu. ²¹ Unkuray hangu ga/aydee nara'a sla'amuu gu Iliitleemuge, gi kone daqa doogunay, tay hagi ilakontay baqamidu Looimoo goori gu Goõ Yeesu Kristu. Ina hari /awaariru gosi, sangumaa hadisi slafimaa gu koraraa goóba hiifaakoo. ²² Unkuray laqama /awaariru sa hida hhaka'a gu hhidimee mala gini /imbiyay. ²³ Hida wakinay ilabu'umakina hari amoo da dafimidu inay aslaago. Kara, sa hida wakinay sigi laqantee /awaariru gu kooma gwaa/amee, haa gi wakiday qayroo koina see, daa tlufu'umisi hari seresemb-boo da slahhaahhaau gu slaqoo koina.

Yuuda daareesi Iliitleemu

²⁴ Inkoo, Iliitleemu goó hiidahhasa ga/aw unkuray, ma maydiri huua tlakwarooge, haa hinguraagi khay pandaa da wanqamee dosii, hari hha'aloo gubasli dakoo see. ²⁵ Ina na Iliitleemu gu ina lenkosi, Ilabu'umiisay goori hari amoo da Looimoo goori, Yeesu Kristu. Wanqamee, diira, hiidahhasa haa /uuru gu tawaaloo ti kosi ina, yadaa koraraa goóbago hiifaakoo, inkoo haa koraraa goóba hiifaakoo! Gu lou.

**Ilaʼimbidu Gu /abu hari Burungaisoo
Burunge: Ilaʼimbidu Gu /abu hari Burungaisoo
(Bible)**

copyright © 2019 Wycliffe Bible Translators, Inc.

Language: Burunge

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

5fd9f69c-03b6-5343-85b8-5043bec70185